

武夷山志卷之十六

武夷董天工典齋編集男勳校刊

名賢上

理學

宋

范仲淹字希文汝南人宋仁宗時資政殿大學士謚文正嘗有和章岷從事鬪茶歌

楊時字中立將樂人熙寧丙辰進士師程純公顥及歸顥日送之曰吾道南矣顥卒又師其弟正公頤一日頤冥坐與游酢侍立不去頤覺門外雪深一尺矣歷知瀏陽

武夷山志

卷之十六

理學

一

餘杭蕭山三縣皆有惠政除荊州教授學者稱爲龜山先生宣和中除邇英殿說書極言朝政邊務靖康初切糾童貫進諫議大夫兼侍講又抗言割地之非擢祭酒疏論蔡京請追奪王安石封爵去亭祀詔從之旋遭詆罷除徽猷閣直學士予祠高宗即位召爲工部侍郎時年已七十六矣力辭老疾乃以龍圖閣直學士予祠致仕八十三歲卒謚文靖嘗過武夷與胡劉諸賢游著有四書解義三經義辨周禮毛詩辨疑并詩文集明弘治時從祀文廟康熙四十四年學臣沈涵請

御書程氏正宗額賜其祠子五人尤著者曰迪字遵道亦遊

程門正公目以遠噐官奉議大夫

胡安國字康侯崇安人紹聖四年第進士授荆南教授歷遷提舉湖南學薦布衣王繪鄧璋蔡京誣以所舉匪人罷歸高宗除給事中命點正左傳因進所著春秋傳上謂深得聖人之旨除侍讀廷臣詆毀除永州予祠加寶文閣直學士退居武夷自號武夷翁年六十五卒謚文定正統時從祀文廟成化三年追封建寧伯康熙四十四年學臣沈涵請

御書霜松雪栢額賜其祠

胡寅字明仲文定公從弟淳子生時以多男欲不舉文定

武夷山志

卷之十六

理學

二

妻夢大魚躍盆中取而子之受業龜山宣和三年第進士歷校書郎遷員外金人陷京師議立異姓與張浚趙鼎不書議狀棄官歸建亭於武夷曰奪秀建炎間歷遷徽猷閣直學士卒謚文忠著有論語詳說崇正辨讀史管見斐然集學者稱致堂先生

胡寧字和仲文定公次子也以郊祀恩補將仕郎時秦檜使其子熺知樞密院事問外議如何答曰蔡元長父子所爲豈所望於相公檜大怒指爲故相趙鼎客罷之尋除夔州路安撫司叅議改知澧州以疾丐祠卒稱茅堂先生嘗居武夷文定公傳春秋多出其手又著春秋通

旨以羽翼家學云

胡宏字仁仲文定公季子嘗遊太學師龜山及河東侯師聖初以廕補承務郎丁父憂服闋不肯出仕求岳麓山長秦檜愠宏不爲己屈乃以潭州岳麓處之宏奉祠家居一無怨尤檜死被召已疾革矣卒謚曰明張栻其門人也嘗著有知言及皇王大紀八十卷詩文五卷學者稱五峯先生子大時字季隨師張栻又從朱文公遊胡憲字原仲文定公從子羅定令安老之子也紹興中以鄉貢入太學尋返故山力田養親廷臣合章以行義聞召賜進士出身授建寧府教授以母老丐祠歸時秦檜

武夷山志

卷之十六

理學

三

用事隱居樂道檜死召爲秘書省正字年七十五矣幡然至闕下抗疏言金必敗盟元臣宿將惟張浚劉琦可用疏入即去上留之不得命以左宣教郎主管崇道觀使歸食祿卒謚靖肅初禁伊洛學中夜潛抄誦習後歸武夷日與劉草堂及文靖相討論著有論語會議學者稱籍溪先生朱文公熹呂成公祖謙及魏掞之皆其門人文公自言遵父命從遊胡劉三君子而事籍溪最久得其學尤多云

劉勉之字致中號草堂崇安人開府滋之曾孫也以鄉貢入京師時禁挾元祐書每潛抄默誦聞涪陵焦定受易

於程子乃與胡籍溪就學南還道過劉文忠安世楊文靖時皆從請業歸武夷與胡劉諸子講學朱韋齊臨卒托以後事且諭子熹師事之勉之爲經理其家妻以女撫教如子侄所著有草堂文集學者稱白水先生

劉子翬字彥冲自號病翁崇安人忠顯公幹季子也初以廕補承務郎辟眞定慕痛父死國難哭墓三年服除通判興化軍尋丐祠主管冲佑觀與籍溪草堂爲道義交時朱文公奉父遺命來遊於門事繼母及足子羽極盡孝友年四十七卒累階右承議郎謚文靖居屏山下學者稱爲屏山先生著屏山集二十卷子珩字平甫有逸

武夷山志

卷之十六

理學

四

才事母以孝聞爲從事郎著詩集十卷

李侗字愿中延平人少豪勇常夜醉馳馬爲懽旣冠遊鄉校有聲聞羅仲素講學師事焉朱熹受業其門以子試吏旁郡迎養歸道武夷會閩帥汪應辰以書幣相招徃見疾作卒謚文靖萬曆時從祀文廟康熙四十四年學

臣沈涵請

御書靜中氣象額榜於祠

張栻字敬夫號南軒四川綿竹人忠定公浚之長子師胡宏宏一見稱之曰聖門有人矣以廕仕直秘閣孝宗初浚起謫籍開府治戎參佐栻內贊機務外參庶政召赴

行在前後讜論甚多歷遷吏部侍郎因忌求去詔以右文殿修撰奉祀武夷冲佑觀年四十八卒謚曰宣從祀孔廟著有論孟太極說經世紀年詩文集

呂祖謙字伯恭號東萊其先世萊州人五世祖夷簡高祖公著曾祖希哲皆居壽州祖好問遷婺州父本中家學淵源有中原文獻之稱成進士後中博學宏詞科召爲博士兼國史院編修歷直秘閣主管冲佑觀復除著作郎年四十五卒謚曰成從祀孔廟初從林拙齋胡原仲遊與文公講習於武夷最久著有博議經史闡範官箴辨志錄弟祖儉字子約太府寺丞以書擊韓侂胄竄嶺

## 武夷山志

### 卷之十六

理學

五

表

朱熹字元晦一字仲晦紹興戊辰進士歷官寶文閣待制贈太師謚曰文追封徽國公宋淳祐時從祀孔廟先世居徽之婺源父韋齋讀書於新安紫陽山以進士爲政和縣尉僑寓建劍間館於尤溪鄭氏而生熹時建炎四年庚戌也韋齋學本龜山歷官吏部員外郎以不附秦檜請祠居建州疾革以書託孤於劉子羽子羽爲築室里第之傍熹乃奉母遷崇安榜其居曰紫陽書堂元不忘故鄉也以父遺命師胡籍溪劉屏山劉草堂草堂以女妻之後又受學於李愿中嘗結廬建陽蘆山之雲谷

曰晦庵因以自號亦稱雲谷老人復築精舍於武夷時年五十有四後卜居建陽考亭六十三矣號滄州病叟最後筮得遯之同人更號遯翁登第五十年歷仕四朝在外者九年立朝終四十曰數爲權奸所沮閒居四十餘年嘗主管華州雲臺觀又主管冲佑觀年七十有一卒蓋寧宗慶元六年庚申也子三塾將仕郎埜迪功郎在寶謨閣待制康熙二十六年

御賜學達性天額於五曲書院四十四年

聖祖南巡又書大儒世澤額並誠意正心闡鄒魯之實學主敬窮理紹廉洛之眞傳聯頒於考亭家祠

武夷山志

卷之十六

理學

六

蔡元定字季通建陽人築室建陽西山學者因稱西山先生聞朱文公名徃師之文公叩其學驚曰此吾老友不當在弟子列韓侂胄設僞學禁文公首被黜元定謫道州文公與從遊諸子餞別於考亭靖安寺時邱膺泣下不能止衆皆感動文公微視元定不異平時因嘆曰友朋相愛之情季通不挫之志可謂兩得矣次日文公與宿寒泉精舍因同訂叅同契終夕不寐乃別寓書文公曰間闕萬狀然自反而縮殊覺怡然貽書訓諸子獨行不媿影獨寢不媿衾勿以吾得罪故遂懈其志踰年以疾卒於謫所侂胄誅贈迪功郎謚文節所著有大衍詳

說律呂新書皇極經世指要子三人淵字伯靜號節齋著太極通旨易解沆改名知方字復之登寧宗進士官兩浙運幹著春秋五論稱復齋先生沉字仲默號九峯從朱文公遊文公晚年以訓釋尙書屬之成集傳在道州父卒徒跣扶柩歸年三十絕意仕途建南山書堂於武夷六十四歲卒謚文正明正統二年從祀孔廟嘉靖間比程太中朱獻靖例以元定從祀啟聖祠康熙四十五年

御書賜元定額紫陽羽翼沉額學闡圖疇允學臣沈涵請也

沉子二模字仲覺號覺軒著續近思錄易傳集解淳祐

武夷山志

卷之十六

理學

七

間授迪功郎本學教授請頒鹿洞學規於州縣杭字仲節號九軒紹定己丑進士累官叅知政事謚文簡後更文肅武夷之詠歸堂乃其讀書處也

黃幹字直卿一字季直號勉齋閩縣人御史瑀之子劉子澄一見竒之以書進文公文公見其志堅思苦以女妻之刪定諸書皆與論議編禮分掌喪祭二篇病革以深衣及所著書授之初文公帥湖南時命奉寧宗即位表奏補將仕郎歷知臨川新淦二縣通判安澧建康除知安慶府致仕卒謚文肅中間予祠者三兩主管武夷冲佑觀文公季子花及諸孫皆其門人著有經解文集兄

東弟杲俱文公門人

方士繇字伯謨號遠菴莆田人父豐之依崇安劉彥修遂家焉士繇受舉於文公遊郡庠不踐塲屋棲止五曲仁智堂六經皆通尤深於易精各種書法著有遠菴集江默字德功崇安人中乾道己丑科歷宰光澤建寧皆有異政嘗從文公於武夷著周易四書訓解本朝典故綱冊上於朝孝宗褒美賜緋魚袋弟點爲郢州錄叅雪冤摘伏多異政從子墳真文忠公門人嘉定進士官至開州知州

歐陽光祖字慶嗣崇安人從劉文靖朱文公學文靖嘗曰

武夷山志

卷之十六

理學

八

志同道合未有若慶嗣有文公令三子師事焉登乾道壬辰進士趙忠定公汝愚張宣公拭薦於朝爲江西運幹

劉燾字晦伯建陽人父懋字子勉號恒軒著述甚富燾與弟炳炯同學於文公乾道壬辰第進士敷歷外吏皆有政聲學禁起築雲莊山房於武夷自號雲莊居士累官工部尙書上疏請罷僞學之禁奏刊文公四書集註於學宮卒謚文簡所著有四書集成禮記解及奏議文集子廔字伯醇號靜齋亦從文公學歷官州縣進秩朝請大夫與蔡沉眞德秀相友善有毛詩解家禮集註等書



孫欽字子明少從蔡沉學精於易以祖廕補官所至有政聲擢侍御史同知樞密院事稱疾歸隱武夷五曲之茶洞有書經衍義文集十卷卒謚忠簡燾之仲弟炳字韜仲號睦堂淳熙戊辰進士官至兵部郎中謚文安文公撰述多與之論訂著有四書問目綱目要畧等書季弟炯字季明慶元己未進士固始令尋掛冠歸隱徜徉於九曲之間

詹體仁字元善崇安人隆興初進士調浮梁尉歷晉江承國子學錄遷太常博士紹興末除太常少卿時光宗久不過重華宮體仁陛對極陳父子至恩引易睽孤之義

武夷山志

卷之十六

理學

九

孝宗崩抗疏請臨祥祭建議定謚曰孝復密贊趙汝愚定大策開禧初知靖康府除司農卿總湖南餉事卒於官平生爲學以存誠慎獨爲本師事朱文公與蔡西山友善眞文忠從之遊嘗問居官臨民之要曰盡心平心而已著象數總義一卷

熊以寧崇安人從文公遊淳熙戊戌第進士授光澤簿剛介自持嘗謂志伊學顏皆分內事著大學釋義中庸讀說

陳孔碩字膚仲候官人偕其兄孔夙師事文公於武夷淳熙乙未第進士歷任外吏有古循良風官至秘閣修撰

數忤韓侂胄史彌遠歸杜門著書有中庸大學解北山集學者稱北山先生以子忠肅公鞞贈太師孔夙慶元進士

鄭可學字子上號特齋莆田人少孤好學再貢禮部不利道過武夷從文公學文公守漳州延之以教子弟晚年刪完大學一編曰此書欲付得人惟子上足以當之僞學禁起獨能旦慕追隨夷險一致嘉定庚午授忠州文學調衡州司戶所著有春秋博議及師說詩集

李閔祖字守約號絅齋光澤人文公高弟嘗留之家塾編中庸章句或問輯畧嘉定辛未成進士歷官廣西帥幹

武夷山志

卷之十六

理學

十

以勤慎明恕聞著有問答十卷弟相祖壯祖姪方子文子同遊文公之門相祖字時可文公命編書說三十餘卷壯祖字處謙同登進士除閩清尉文公嘗語以爲學之要方子字公晦自少端謹文公曰觀子爲人必寡過然寬大中要規矩和緩中要果決遂以果名其齋登嘉定甲戌科授泉州推官遷學錄因不交史彌遠或譖之使言官劾罷著有傳道精語禹貢解真文忠進其書於朝起辰州通判未赴特加朝奉郎致仕文子字公謹登紹熙癸丑科歷知閩潼二州蜀人咸宗其政教

葉味道字知道世爲括蒼人徙居建陽師事文公僞學禁

起味道對策仍本程子知貢舉胡紘指爲僞徒黜之復從文公於武夷嘉定庚辰登第除鄂州教授歷遷崇正殿說書秘書著作佐郎謚文修著有四書說大學講義祭法等書子采字仲圭少從蔡淵學淳祐登進士累官侍講著有近思錄集解西銘性理解諸書嘗居武夷八曲之鼓子書堂

吳楫字公濟崇安人少爲諸生鬱鬱不得志退而閉戶讀書與朱文公蔡文節講明理學文公扁其書室曰悅齋遣子師之紹興辛未特奏名授臨桂主簿

游九言字誠之號默齋初名九思建陽人十歲即爲文詆

武夷山志

卷之十六

理學

十一

秦檜長從張宣公棫遊宣公教以求放心舉江西漕司進士第一調古田尉歷江州錄事沿海制司幹官入監文思院張宣公帥廣西辟爲幕屬及弟杓帥金陵又辟撫幹時學禁方嚴九言作上元明道祠記罷歸乃築室武夷曰水雲寮開禧初又爲淮西安撫機宜尋知光化軍充荆鄂宣撫叅謀官未行而卒端平中贈直龍圖閣謚文清

國朝王梓辨衷徐正德間楊恒叔山志則以爲建自  
建文清不言文肅隆慶間邱止山所修縣志云肅本  
文清之長平人歷官罷歸寓居歷陽遂葬於和州  
建陽之長平人歷官罷歸寓居歷陽遂葬於和州  
至其仲孫肅復歸長平路夢語云逢羊可歇遇虎  
可居過武夷因結小廬於羊墩後得沉虎之地居之

更名澄澗始籍崇安余考游氏族譜其言與邱志合則水雲寮無與於文肅明甚衷徐牽引殊無依據不足憑也謚文清見游氏族譜省志郡志閩大記皆作文靖茲以族譜爲正

眞德秀本姓慎避孝宗諱改眞字景元後更景希浦城人慶元五年進士累官資政殿學士謚文忠其學以毋自欺爲本立朝不滿十載累疏數十萬言皆切當世要務直聲震中外史彌遠忌之輒擯不用築室武夷山中以斯文自任一宗朱子黨禁之後正學賴以復明著有大學衍義文章正宗諸書正統間從祀孔廟康熙四十五年學臣沈涵奏請

御書力明正學表其祠子志道仕至戶部侍郎

武夷山志

卷之十六

理學

十二

徐幾字子與號進齋崇安人嘗與詹琦築靜可書堂於武夷博極群書尤精於易自晦翁之後理學之傳獨臻其奧景定間廷臣交薦以布衣召對授崇正殿說書上器重之詔補迪功郎遷建寧府教授兼典建安書院撰經義以訓多士字內尊之稱曰進齋先生

熊禾字去非號勿軒晚號退齋崇安人咸淳三年進士任寧武州司戶叅軍入元不仕退居武夷山中築洪源書堂於五曲以講學遠近翕然宗之後於所居擴而充之易爲家塾中祀先師侑以周程張朱五賢學徒彌衆著有大學講義尙書口義春秋通解易講義書說諸書學

者稱勿軒先生

元

陳普字尙德號霍童寧德人宋末倡明理學派出輔氏而源於考亭與熊勿軒友善隱居武夷之陷石堂元初聘爲本省教授不就四方來學者數百人著有四書集解書傳補遺易說石堂文集學者稱爲石堂先生

雷機字子樞建安人延祐間進士歷任縣尹俱以循吏著聲改翰林待制朝散大夫父德潤邃於易機與弟拱杭皆以易學鳴于時所著經解學者稱雷門易

胡一桂字庭芳婺源人年十八領鄉薦試禮部不第退而

武夷山志

卷之十六

理學

十三

講學人號雙湖先生嘗兩至武夷與熊勿軒禾論說叅証勿軒稱其學業本自朱氏而尤粹於易著有史纂通要勿軒爲之序

明

羅倫字彝正號一峯江西永豐人成化丙戌狀元授修撰李賢劾之謫泉州市舶司提舉明年詔復官尋以疾辭講學授徒嘗流寓武夷追謚文毅

王守仁初名雲字伯安號陽明餘姚人南冢宰華子也弘治己未進士授兵部主事正德初抗疏救言官忤劉瑾廷杖謫貴州龍場驛丞瑾使人要殺之乃遁跡迂道至

閩經武夷流連數月而去瑾誅累官巡撫南贛汀漳勦四郡積寇不征調不加賦運籌有方後擒宸濠遷南大司馬封新建伯嘉靖時又征思田平兩廣以病乞休薨隆慶間贈新建侯謚文成萬曆十二年從祀孔廟公理學事功掩蓋前代建立祠宇書院凡四十餘所武夷有祠二一在一曲一在五曲所著有傳習錄詩文全集四十卷

湛若水鄒守益唐順之曾遊武夷講學若水字元明號甘泉增城人弘治乙丑進士累官兵部尙書謚文簡著有格物通要一百卷及甘泉集守益字謙之號東廓安福

武夷山志

卷之十六

理學

十四

人正德辛未會元探花官至祭酒謚文莊初以史官里居師事文成於虔州順之字應德一字義修號荆川武進人嘉靖己丑會元歷銓翰官坊同羅文恭洪先建言被黜後以倭警需才薦用擢淮陽巡撫追謚襄文守益子善授閩臬司爲其父建祠於武夷大雲寺故址

蔡烈字文繼龍溪人受學於蔡文莊公清年方壯棄舉業嘗遊武夷居精舍數日曰脚根自此定矣嘉靖初薦舉遺逸以養母辭著有孝經定本大儒粹言讀書錄諸書羅洪先字達夫號念菴吉水人嘉靖己丑狀元官贊善以建言被謫嘗寓武夷講學從遊者甚衆年六十一正襟

歛手而逝謚文恭一曲有祠

世傳羅文恭仙去數見燕齊海上錢宗伯謙益自言曾於京口遇蜀人馬生日念庵遠訪公虞山得母相

失乎及歸問之果有老人衣冠甚偉策杖扣門稱西江人不告姓名而去然乎否乎

趙恒字志貞號特峯晉江人嘉靖戊戌進士以推明經術爲己任讀書武夷山中遠近之士從之初任袁州教職學使者延於鹿洞集諸俊又師事之後官姚安太守以禮化民一變蠻俗所著有春秋錄疑等書

李材字孟誠號見羅豐城人嘉靖間進士由刑工兩部主事歷按粵東兵備滇南晉右僉都御史巡撫鄖陽萬曆間謫戍漳州鎮海衛寓居建安著有觀我堂集兵政紀

武夷山志

卷之十六

理學

十五

畧等書嘗講學於武夷四方從學者衆督學徐即登建書院於九曲以居之即登萬曆癸未進士材之同邑門人也

董應舉字崇相號見龍閩縣人萬曆戊戌進士初任廣州教授稅璫欲於學宮閒地馳射應舉率諸生譁之璫氣奪而止擢南博士累官工部侍郎嘗建屯田之策崔魏忌之格其議邊功垂成而隳識者惜焉尋爲阿璫者劾罷居武夷之八曲涵翠洞與生徒講學老而不倦著有文集建祠於四曲御茶園通仙井左

葛寅亮字冰鑑號岷瞻錢塘人萬曆辛丑進士文章政事

理學皆有可稱初因父大成任崇安縣丞隨至閩讀書  
武夷山中天啟間督學閩中廉明造士諸生建祠祀之  
黃道周字幼玄一字螭若號石齋漳浦人天啟壬戌進士  
入史館歷少詹事初忤魏忠賢鐫級褫職者再廷杖詔  
獄尋復原官謝病歸寓武夷講學經歲後伏節而死明  
末論人物者以山陰劉念臺宗周及先生爲士林儀表  
云



官守

宋

趙抃字閱道其先京兆奉天人五代之亂始移越遂爲衢  
州西安人景祐元年進士初授武安軍節度推官秩滿  
遷著作郎知崇安縣事爲政簡易晝之所爲夜必焚香  
告天不敢告者不敢爲也邑南郊田公鑿渠引西郊水  
以灌之又於南郊築隄引水至新陽溉田不下數千畝  
至今稱其隄曰清獻隄渠曰清獻渠縣圃有手植梅後  
人立石銘曰召有棠萊有栢清獻之梅碑以石嘗結亭  
於武夷名曰吏隱爲公餘遊息之所遷御史彈劾不避

武夷山志

卷之十六

官守

十七

權貴時有鐵面御史之號知成都以一琴一鶴自隨未  
幾叅知政事論青苗法詆王安石出知青州時有蝗自  
死麥大有秋知越州歲饑疫公發廩施藥民以獲全他  
如在睦在杭在虔在河北政皆以惠利爲本後以大學  
士加太子少保致仕卒贈太子少師謚清獻公爲人和  
易溫厚嫁兄弟之女以十數在官爲人嫁孤女二十餘  
居鄉塋暴骨施棺給薪無算蘓文忠撰神道碑所載甚  
詳著有清獻集子屺官至太僕少卿

汪應辰字聖錫玉山人紹興五年進士第一除鎮東軍簽  
判入爲正字忤秦檜出判建寧改袁州召爲吏部郎又

出知婺州福州尋以學士爲四川制置使兼宣撫進吏部尙書兼學士中貴嫉其直交謗予祠卒於武夷呂成公祖謙嘗師事之

諸葛廷瑞字麟之泉州南安人紹興丁丑進士乾道三年爲崇安令創趙清獻胡文定祠於學宮文公爲之記後以起居舍人使金金人請易衣冠詰難數四至露亦不能奪乃加禮歸之孝宗稱其老成端重除吏部侍郎改兵部侍郎卒贈太子少保嘗冒雪至武夷二曲後人遂於登臨處名舞雪臺重其人存其迹也

韓元吉字無咎潁川人紹興間由建安令歷守建寧表率

武夷山志

卷之十六

官守

十八

端莊興學立教士民皆德之以軍功轉朝奉大夫仕至吏部尙書當在任時常尋武夷九曲之勝多題詠素與朱子交善精舍成屬筆爲記

趙汝愚字子直宋宗室居餘干成進士以修撰授福州兩至崇安設有舉子倉三所一在冲佑觀當紹熙內禪之際使國家危而復安汝愚力也韓侂胄忌之竄永州行至衡州又使衡守錢鏊窘辱之遂暴卒侂胄誅復官謚忠定

洪邁字景盧號容齋樂平人忠宣公皓季子也中博學弘詞科有父風以學士使金抗節淳熙中知建寧府威惠

並行嘗遊武夷浩歌紀勝後以端明殿學士致仕卒謚文敏有容齋五筆夷堅志

王遂字去非一字穎叔金壇人嘉泰二年進士淳祐三年爲建寧太守以文學政事著有遊武夷詩入爲御史累官至學士立朝多讜論史臣偉之

葉夢鼎字鎮之寧海人以上舍優等釋褐嘗知建寧府築石鼓書堂於八曲景定中簽書樞密院事賈似道造銀關罷兩界會子以爲厲民爭之咸淳初叅知政事進右丞相九年乞還山林扁舟徑歸或以禍福爲言曰廉恥事大死生事小萬無可回之理子應及應有俱登仕籍

武夷山志

卷之十六

官守

十九

劉克莊字潛夫莆田人嘉定初以任子補宣教郎知建陽縣歷知漳州淳祐六年賜同進士出身以右文殿修撰知建寧府歷推工部尙書嘗論權臣壞朝綱開邊釁又言濟王寃皆人所難者以龍圖學士致仕卒謚文公曾遊武夷有詩著後村居士集

王埜字子文號潛齋金華人受業真西山嘉熙十二年進士出守建寧陞辭上命之曰游胡朱真風流未泯表厥宅里以率其民則予汝懌至郡興起書院文教大興武夷著有詩文寶祐初拜端明殿學士簽書樞密院事封吳郡侯有奏議文集

林天瑞字子輯温州人景定二年知崇安縣免人戶助網錢給孤貧粟帛修縣獄創太平西橋又崇尙理學增祀胡憲胡寅胡宏劉勉之蔡元定於學宮嘗重葺五曲書院增建古心堂

陳夢庚號竹溪宋端平間判泉州

元

詹光祖字良嗣號月厓崇安人宋景定二年設武夷山長以教邑之士子至元初改爲教授光祖預其選子天祥天麟

母逢辰字希說號梅菴劍南人元至元間任建寧府判嘗

武夷山志

卷之十六

官守

二十

倡修紫陽書院熊勿軒撰疏甚稱許之所謂以蜀西之珍負道南之望者也

唐仲實字桂芳一名仲歛縣人甫十歲日記數千言元季爲南雄路學正洪武中召對稱旨攝紫陽書院山長學者稱白雲先生有武夷小稿

王翰字用文元季東阿人爲閩行省郎中明興屏居永福不再仕尋自殺有友石山人稿子偁別見

明

張矩字孟方其先廣陵人父伯巖爲崇安五夫巡檢因卜居屏山求胡劉諸賢遺書授矩學成名立人以北山學

士呼之洪武三年以薦授本學司訓闡發理學啟迪多  
士士歌之曰前有載後有拭彼美孟方匹休無斃武夷  
會真廟撰有碑記

曹端字公正華州人洪武時以監生授刑部主事陞常州  
府同知因調民修城失奏左遷崇安令嘗置二簿紀民  
善惡民用感化公退之餘流覽武夷溪山後復爲邢部  
主事累官至雲南布政使引年致仕猶給半俸以優之  
崇祀名宦

夏原吉字維喆湘陰人以國子生入禁書誥勅受知太祖  
授戶部主事建文初以戶部侍郎充採訪使巡福建永

武夷山志

卷之十六

官守

二十一

樂初爲戶部尙書進少保賜銀印曰繩愆糾繆宣德初  
又賜範金銀印曰含弘貞靖卒贈太師謚忠靖嘗過武  
夷有詩紀遊子瑄官尙寶少卿孫崇文舉進士弘治間  
官右通政

蘓伯厚原名埤建安人與其從子鉦嘗登臨武夷多題咏  
洪武乙丑以明經授建寧訓導永樂初入翰林預修寔  
錄大典卒於官著有素履集鉦字良聲工詩善書畫有  
竹坡樓集

載珊字廷珍浮梁人弘治間爲閩左右方伯嘗遊武夷有  
詩累官刑部尙書左都御史以清廉著卒贈宮保謚恭

簡

蕭乾元字必克萬安人成進士任建寧僉事道持己恪恭  
別奸嚴毅有德於民

周鵬字文議華亭人爲福建巡按

周震崑山人爲福建清軍御史

二周與蕭僉道同修武夷書院置田供祀稱盛舉焉

顧夢圭字武祥崑山人嘉靖癸未進士初爲閩叅政再爲  
閩臬司陞江藩平生清約自居猶爲寒素有贅疣集嘗  
遊武夷有題咏

萬虞愷字懋卿南昌人嘉靖戊戌進士以兵垣外轉監司

武夷山志

卷之十六

官守

二十二

仕至少司寇有楓潭詩鈔

劉侃字正言京山人嘉靖癸丑進士由右藩轉左藩有新

陽館集

宋儀望字望之永豐人嘉靖丁未進士歷督學叅政仕至  
大理寺卿有陽山集華陽集

顧大典字道行吳江人隆慶戊辰進士亦以副使督學有  
清音集

二顧同萬劉宋先後任閩中司道皆有遊武夷題咏

李元陽字仁甫號中溪太和人嘉靖丙戌進士以御史按  
閩後遷荆守有詩集

江以達字子順號午坡貴溪人嘉靖丙戌進士以刑部郎  
典閩試嗣復督學後遷湖廣副使有午坡集

張時徹字惟靜號東沙鄞縣人嘉靖癸未進士叅政閩中  
累官兵部尙書素以風雅名有芝園集

汪佃字友之弋陽人正德丁丑進士以待讀出爲建南分  
憲歷官正詹有東麓集

李江張汪四公同於嘉靖戊戌  
歲梯大王峯之壁勒石爲記

李東光字晋卿南昌人爲建陽令有廉操終太僕寺丞

郭瑞大庾人爲崇安令以清白著秩滿不能治裝里胥釀  
金爲贖却之曰醋味成酸其性難變

武夷山志

卷之十六

官守

二十三

李郭二公與李元陽四公同  
遊大王峯皆見之題壁者也

錢爍字君望南通州人嘉靖壬辰進士官至叅議初知建  
寧府殫心愛民時徭役繁重編庫子編夫保民有千金  
之產者立盡爍力爲調劑去冗剔蠹合郡德之又奏免  
武夷茶貢請以歲編茶夫及水脚銀兩賚府造辦自此  
遂罷武夷茶場崇民積困蓋自公而甦也

宋衡字士南萬安人登嘉靖壬辰榜以邑令歷官監司藩  
臬巡撫山東入佐吏工二部值河決爲總河疏濬河道  
奏請開新渠運道大通御製詩以褒之卒加太子太保  
先嘗督閩學遊武夷刻字於一曲之水光石時爲嘉靖

甲寅之夏也所輯有道南原委錄

宗臣字子相號方城揚州興化人嘉靖庚戌進士武夷冲佑觀右有宗學使祠先是任福州守道守城禦倭開門納逃民數萬又伏火器以潰賊殊績偉然省之烏石山亦有祠

徐中行字子與號天目長興人嘉靖庚戌進士爲福州兵備副使轉督糧叅政進臬司釐弊祥刑歷有偉績遷江右布政閩人愛戴之建徐方伯祠於武夷冲佑觀右

吳國倫字明卿興國州人嘉靖庚戌進士授中書進給事仕至河南叅政嘗官建寧司馬與徐中行宗臣宦遊武

武夷山志

卷之十六

官守

二十四

夷著有甌甄洞稿數十卷

王世懋字敬美號麟洲太倉人薊遼總制忬之次子也與兄世貞俱負海內重望登嘉靖己未進士萬曆間視學閩中衡鑑精絕所拔多竒士秩滿轉叅政尋擢南太常寺少卿先是總制公開府閩浙迄督師薊北以不附巖嵩被禍穆廟辨雪詔追復原官世懋至武夷建祠於冲佑觀左以祀之

汪道昆字伯玉歙縣人嘉靖丁未進士福建巡撫歷官兵部侍郎有南溟集

樊獻科字文叔號斗山縉雲人以進士官侍御代巡閩省



時倭寇熾甚巡撫與諸將謀鍵城以守獻科憤然曰人臣奉簡書境外苟利社稷專之可也巡撫聞之決戰倭遂就殲前後兩入武夷題刻凡數處又藏魏王子騫顱骨於仙館巖爲文勒石以記之

殷從儉字汝中桂林人隆慶初巡撫閩中時倭寇初殄籍民丁田爲戎餉有四丁糧六之派儉至悉爲革除積困以蘓不以家口自隨衣食儉約卒於官吏民縞素送喪者載道建祠於西湖祀之嘗遊武夷水光石有勒記

趙叅魯字宗傳鄞縣人隆慶時進士萬曆間督學八閩聞母病封還璽書就道憂終起原官風操愈勵擢光祿少

武夷山志

卷之十六

官守

二十五

卿尋爲閩撫博大寬仁法令畫一仕至大司寇嘗至武夷於一曲水光石勒字署曰四明山人蓋其別號也

耿定力字子健號叔臺麻城人隆慶辛未進士官至兵部侍郎與兄定向講學齊名任操江時疏陳權使罔利并極言中使之害督學閩中識拔皆知名士與鄭李二公同建武夷三友堂於六曲天遊峯

鄭邦福字洪疇一字羽夫號鐵耕上饒人與定力同年由部屬歷閩省監司能鋤豪釐禦海寇有功晉南岡卿有詩集

李瑄字邦和號稠原豐城人萬曆丁丑進士官閩僉事端

介執法後以彈劾閣臣削籍耿公有三友堂記

耿定向字楚侗號天臺嘉靖丙辰進士官至大司農謚恭簡曾撫閩政治卓然嘗爲崇安令朱璉撰武夷觀復堂記

余乾貞字秉智遂安人隆慶二年以進士知崇安居官簡重得大體時有倭警四封戒嚴乾貞條上十二事皆處置得宜邑舊無城特創築之金湯鞏固民至今頌其功嘗至武夷吟眺怡情召拜侍御史

朱璉字文卿號謹吾新淦人隆慶辛未進士爲崇安令發奸摘伏豪右斂跡清浮糧定疆畝修學造橋以政最擢

武夷山志

卷之十六

官守

二十六

侍御史歷遷至副都嘗建觀復堂於武夷宮後先是道士以宮田典豪戶久管不歸璉爲之清復自本邑以及建陽凡千餘畝道士德之即其堂改稱朱公祠以祀之張鳳翼爲撰復田記

郭子章字相奎號青螺泰和人隆慶辛未進士爲建寧司李寬嚴有體督學徐即登延李中丞材講學於武夷九曲書院嘗爲記官至大司馬

沈傲炘字叔永歸安人隆慶時進士萬曆間視學八閩嘗勒字於六曲仙掌峯復任建寧道紀綱明肅屬吏則之鍾惺字伯敬景陵人萬曆庚戌進士初授行人遷南禮部

主事歷郎中以僉事提學福建事竣遊武夷有詩記著  
隱秀軒集

林一煥字中瑩浙江孝廉萬曆間爲崇安令治才明敏能  
清積牘號爲神君嘗迎仙蛻禱雨建徐仙樓於冲佑觀  
左以祀之

顧士琦字惺涵太倉人成進士爲崇安令政嚴彰瘡風俗  
丕變調晉江擢侍御嘗作亭於武夷溪畔曰入佳亭今  
陸令重建爲問津亭

虞大復字來初金壇人成進士爲崇安令爲民興利曾與  
主考張宮諭以誠題名於仙掌峯之石壁

武夷山志

卷之十六

官守

二十七

簡霄字騰芳新喻人萬曆甲戌進士官至少司馬嘗代巡  
福建有容溪集

沈涵德清人隆慶時進士代巡福建

龔一清字季白義烏人萬曆時進士代巡福建

楊四知字元述祥符人萬曆甲戌進士代巡福建官至廷  
尉

簡沈龔楊四公或題  
詩或勒字同爲宦遊

李得陽字景渠廣德人萬曆間閩副使

熊明遇字良孺號壇石進賢人萬曆辛丑進士歷官至閩  
僉事累兵刑二部尙書立朝慷慨不避權倖論者稱有

古大臣風嘗寓武夷從遊之士甚衆咸以淵源勿軒云  
著有綠雪樓集采薇集中樞集子人霖字伯甘官銓部  
傅崇中字壹饒進賢人萬曆丙午舉人天啟間知崇安清  
廉果毅造士愛民署內有並蒂蓮之瑞自爲文記之秩  
滿陞刑部主事恤刑粵西擢懷慶太守皆著最績所存  
武夷詩句士林猶傳誦之

國朝崇令王梓曰傳公瑞蓮記木刻至今揭之亭額  
其詞歷徵往事以爲希觀余自癸未蒞此至今庚寅  
八年之間瑞蓮凡六見邑人尤異之工繪事者往往  
作圖以見贈余每見必記以詩屬而和者漸成卷帙  
亦一時之幸也  
聊附記於此

董燧字兆時號蓉山嘉靖辛卯鄉舉任枝江縣以平施州

武夷山志

卷之十六

官守

二十八

諸司功進刑部郎中出爲建寧司馬過武夷五曲書院  
書有大宋道德之宗額謀之郡守劉公佃移建王文成  
公祠有詩勒水光石嘗與羅文恭公鄒文莊公講學不  
倦著有五經問答圓通問答

梁鵬字冲宇順德人成進士爲崇安令常建一曲飛翠亭  
歷官戶部郎清貧不能自給

李炳茂號嶽盤閩縣人萬曆間歲貢長汀教諭

徐問守用中武進人成進士任閩叅政累官大司農謚莊  
裕有養齋集山堂萃稿

張肯堂字載寧號倪淵華亭人天啟乙丑進士崇正間按

閩撫閩極著風節嘗於六曲天遊峯構森天閣登陟嘯  
咏仕至尙書全家赴水殉國難

周亮工字元亮號櫟園祥符人崇正庚辰進士累官戶部  
侍郎嘗歷閩中藩臬有平邵武士寇功

孫朝讓字光甫號九芝常熟人崇正辛未進士以部屬出  
守泉州晉建南道嘗剪凶強以遏亂萌因躬巡關隘登  
武夷流覽賦詩後陞閩臬稱疾致仕

柴世蜨字蓮生仁和孝廉崇正間令崇安才極精敏而政  
尙慈惠民有鬻妻以完逋賦者聞之惻然爲贖歸之秩  
滿內擢部屬尋爲海道武夷之王葛二賢祠其所修也

武夷山志

卷之十六

官守

二十九

張堯政字安臣仁和孝廉宰崇安多武夷題咏以風雅著  
蔣棻字南陔常熟人崇正丁丑進士爲建安令造士恤民  
曾以公事至崇安覽勝武夷有長歌一首

國朝

殷應寅字一生滕縣人以拔貢順治七年爲崇安令時邑  
令徃返過裴村武夷觀中供應應寅裁去歷官通政爲  
崇請減鹽引崇鹽戴德

范承謨號螺山瀋陽人文肅公文程仲子順治壬辰進士  
由庶常累遷學士擢浙撫尋拜兵部侍郎總督浙閩耿  
變逆叛公被執不屈幽繫三載卒遇害贈太子少保謚

忠貞一時與公同殉者親朋至隸卒凡五十三人最著者吳門嵇永仁字留山遷安畢萬字完一有泰寧人許鼎者當公在繫時陰左右之後潛負公烈骨歸京師或謂鼎乃武夷仙靈所使公默有所喻呼之爲武夷子贈以長歌有螺山落魄武夷開之句公博學工詩文遭難多所散失僅存吾廬稿浙閩奏議及百苦吟畫壁詩文十餘卷行世公子時崇字自牧亦總督浙閩多善政歷官兵部尙書

王頊齡號瑁瑚華亭人康熙丙辰進士甲子典試福建官內閣大學士

武夷山志

卷之十六

官守

三十

覺羅滿保號島山康熙甲戌進士任閩浙督部院戊戌年重修武夷精舍有碑記

丁耀亢號野鶴青州人順治明經惠安令有詩文集

白壁琛奉天籍陝西人由蔭生爲建南道僉事陞江西督糧叅議迂道至武夷流連登覽時康熙四十四年也

沈涵字度汪號心齋歸安人康熙丙辰進士康熙四十二年以青宮侍讀來視閩學閩中詞林司衡自此始也崇奉先儒奏請賜額者凡七祠又從邑令王梓請於武夷紫陽書院立文公後裔朱元煒爲弟子員以奉祀四十五年賚捧

御書霜松雪栢額抵崇安胡文定公安國祠時同至者爲建  
延邵道陳公廷統號秋厓澤州人事竣曾遊武夷登天  
遊眺望各有詩文

阿金字雲舉滿州人康熙辛未進士翰林檢討典試福建  
識拔真才至武夷有題咏

來謙鳴字聲吉浙江蕭山人雍正癸卯進士奉

旨尖圈記名以各館効力及內廷教習用仍拔爲翰林甲辰  
春授椒園萬善殿教習尋丁內艱服闋爲直隸魏縣令  
清廉果毅爲民興利以政最薦擢雲南澂江府太守時  
有苗警親勦以除宵小有平土寇功薦調昭通府太守

武夷山志

卷之十六

官守

三十一

晉廣西右江道尋擢廣東塩運司旋調延建邵道紀綱  
明肅屬吏則之嘗攝建守造考棚以杜場弊浚城河而  
溯河源培龍脉而蘓元氣建義學以振文風造士恤民  
無利不興雖龔黃卓魯無以過之間于巡邑公餘過武  
夷流連題咏有和朱子櫂歌志載不朽云

史曾期號晴帆江南荆溪人雍正癸卯孝廉授內閣中書  
特署內閣侍讀補授鳳陽府司馬仁風洋溢隨署鳳陽府太  
守運漕有功紀錄加級旋署六安州守又署廬州府太  
守太平府太守寧國府太守安慶府太守五府一州德教  
誕敷於乾隆十一年丁艱守制服闋以卓異引見奉

旨暫授南安司馬到任即陞旋署南安府太守庚午夏實授  
建寧府太守下車之下無弊不察無利不振建義學以  
培士風選鄉約以宣

聖化適值米價沸騰衍閱道之善術師文正之良規闔郡安  
寧間于公餘過武夷特命良工細繪山圖展卷卧遊云  
魏麟徵號蒼石溧陽人康熙丁未進士九卿以清名薦舉  
授邵武太守居官仁厚德政多端著有石屋詩鈔行世  
龐塏號雪崖任丘人康熙己未舉博學宏詞授翰林檢討  
出守建寧事竣遊武夷題詩紀勝勒字巖石

張翔鳳號南野四川安岳人康熙辛未進士由翰林出守

武夷山志

卷之十六

官守

三十二

建寧民譽夙昭天資醇厚以庾鮑之才播龔黃之績因  
修復文公精舍嘗屢過武夷焉

李天爵號逸齋合肥人相國容齋之胞弟福州別駕署事  
建寧嘗屏從過武夷留連名勝風雅絕俗

陳朝儼字陞來號望庵仁和人甌寧令康熙丙戌年至武  
夷有公餘草武夷遊草

程湄字伊在號蒹庵江都人康熙甲戌進士崇安令振興  
文教樂育人材嘗遊武夷有詩

王梓字琴伯邵陽人爲崇安令有吏才善詩好客建羣賢  
祠於一曲嘗纂武夷志擢守州去



李輔寅號木亭程鄉人康熙癸酉孝廉建陽令  
陸廷燦字扶照嘉定人以明經爲崇安令潔己愛民旌別  
淑慝嘗仝主草堂較訂武夷山志表章往哲刊播各集  
每於公事入山遇景留題文章經濟兼而有之

黃鑒字焘玉福州人由明經任邵武府學教授康熙庚寅  
冬遊山

藍陳畧字勲卿漳浦人舉孝廉建陽教諭輯有武夷紀要  
二卷未刊行世

陳銓號榕亭侯官人康熙乙卯選貢壽寧廣文陞東鄉令  
鄭瓚號慎菴侯官人康熙庚申舉人崇安教諭充浙江同

武夷山志

卷之十六

官守

三十三

考官輯有武夷山志未刊行世

龔駿聲字聲遠邵武孝廉爲崇安教諭倡建學宮嘗遊武  
夷有留題

倪煒字懌仲晉江人以明經爲崇安司訓同龔司鐸倡建  
學宮時李相國安溪先生遊武夷謁文公祠倪從之遊  
告以祠屋殘破相國白之當道五曲書院煥然重新

何瀚字君濟號北海閩縣人康熙丁酉孝廉掣入刑部學  
習揀署廣東從化電白二縣令政簡刑平性愛靜寂改  
就廣文乾隆甲子任崇安教諭訓迪有方學問淵博長  
于書精于詩古文詩稿盈笥彙篋嘗遊武夷多所題咏

主管

宋

程振字伯起樂平人徽宗時爲御史遷司業忤王黼罷提舉冲佑觀居三年起原官進吏部侍郎靖康之變振爲開封尹死之端平初謚剛愨

劉文靖公子翬紹興元年辭興化通判主管冲佑觀有詩云幾年歸夢水雲間猿鶴重尋已厚顏慚愧君恩猶竊祿官御新帶武夷山蓋初啣命歸武夷時作也詳理學傳

張維字振綱一字仲欽南平人紹興八年進士調汀州軍

武夷山志

卷之十六

主管

三十四

推官有平盜功改知閩縣民服其廉號曰張太清歷官尙書左司郎中尋以讒罷主管武夷冲佑觀卒朱文公志其墓著奏議及盤澗集若干卷

林大中字和叔永康人登紹興庚辰榜歷臺省講官光宗時論陳賈儉邪寧宗時上書陳韓侂胄奸狀又論彭龜年不當斥及救呂祖儉駁汪義端遭學禁予祠提舉冲佑觀侂胄誅召爲吏部尙書簽書樞密院事卒贈資政殿學士謚正惠有文集三十卷

辛棄疾字幼安號稼軒歷城人紹興間起義兵縛叛將張安國於臨安斬之授江淮判官歷遷湖南安撫皆有平

盜功嘗知福州兼安撫慮濱海易亂積錢五十萬緡榜曰備安庫欲以糴穀練兵事未行爲臺臣誣劾予祠者三皆主管冲佑觀理宗朝再秉節鉞終龍圖待制謝枋得稱其慷慨大節不在岳武穆下德祐初贈太師謚文敏著有稼軒集

黃永存字堅叟邵武人父中美字文昭靖康初官朝議大夫張邦昌僭位感憤而卒永存其第四子也紹興間進士以才能召爲尙書郎累官至正議大夫嘗以朝請大夫主管武夷冲佑觀

王師愈字與正一字齊賢金華人以進士除金部郎中兼

武夷山志

卷之十六

主管

三十五

崇正殿說書累官兩浙提點刑獄上章丐閑提舉冲佑觀卒朱文公撰神道碑稱其孝宗初以讎耻未報中原未復爲奏忌者巧語中之轉徙於外以沒有識者爲之嘆恨云

黃度字文叔新昌人登隆興癸未科紹熙間爲御史光宗不過重華宮連疏切諫寧宗初不附侂冑以冲佑觀祿歸養尋起知建康府罷科糴輸送之擾活饑民無算遷寶謨學士至禮部尙書著有史通諸書

李祥字元德無錫人隆興元年進士爲錢塘簿累遷國子祭酒趙忠定以言去國上疏力争謂汝愚勛勞著於社

稷精忠貫於天地李沐劾爲黨斥之主管冲佑觀以原官致仕卒謚肅簡

陸游字務觀山陰人初以廕補登仕郎隆興初賜進士出身敷歷中外論奏甚多范成大帥蜀辟爲叅議不拘禮法自號放翁嘉泰間詔同修孝光兩朝實錄及三朝史權同修撰兼秘書監書成進寶章閣待制致仕嘗提舉冲佑觀游才氣超逸尤長於詩詩文集凡百三十卷晚年爲韓侂胄撰南園閱古泉記見譏清議然考其文曰許閒歸耕爲公之志則於侂胄有微辭又何嫌乎

彭龜年字子壽清江人乾道己丑進士官秘書郎光宗久

武夷山志

卷之十六

主管

三十六

不朝重華宮痛切上疏指左右離間之罪寧宗時遷吏部侍郎使金文公獨疏論韓侂胄見黜龜年附奏云始臣約熹同糾今熹罷臣宜并斥不報於是條數其奸力攻之復上疏求去嘉泰初除修撰提舉冲佑觀後以寶謨閣待制致仕卒上追念其忠鯁賜謚忠肅擢用其子欽著有經解等書

張宣公栻以右文殿修撰提舉冲佑觀蓋孝宗淳熙初年也詳理學傳

傅自得字安道晉江人以父死節補承議郎歷福建提點刑獄司知興漳進吏部郎中直秘閣兩爲福建轉運副

使提點浙西刑獄罷歸以朝奉大夫直秘閣主管冲佑  
觀朱文公爲其行狀云孝友潔廉足高一世吏事亦過  
人遠甚著有文集三十二卷仲子伯成爲文公高弟  
朱文公熹於淳熙三年以秘書郎奉祠主管冲佑觀後二  
載起知南康軍詳理學傳

葉適字正則永嘉人淳熙戊戌進士官司業輪對極言大  
讐未報疆土未復帝慘然動容侍郎葉栗挾私忿劾朱  
文公適抗章辨其悖謬遂罷栗人心洶洶適與趙丞相  
汝愚定議內禪立嘉王中外乃安侂冑擅權遂求補外  
尋主冲佑觀復超仕至寶文閣學士卒謚忠定著有水

武夷山志

卷之十六

主管

三十七

心集

呂成公祖謙歷官博士編修直秘閣尋主管冲佑觀詳理  
學傳

鄭橋字惠叔莆田人乾道己丑進士第一由僉判累官至  
資政大學士以觀文殿學士致仕歷仕孝宗光宗寧宗  
三朝皆以忠實見稱使金不屈淳熙間嘗乞祠主管冲  
佑觀

王自中字道甫浙江平陽人淳熙中進士授分水令樞密  
王藺薦召對帝壯其言除知光化軍光宗初主管冲佑  
觀尋起知興化軍病不獲用論者惜之

薛叔似號象先永嘉人遊太學釋褐官國子錄孝宗嘉其奏對遷編修除左補闕劾首相王淮去位主管冲佑觀復召爲太常少卿累官兵部尙書端明殿學士卒謚恭翼有稟二十卷

陳舜申字宋謨連江人淳熙甲辰進士令漳浦以循良奏績進著作郎丐祠主管冲佑觀著有易鑑四書解兵書訂解高齋文集累世同爨里推德門

劉光祖字德修四川陽安人登進士第光宗初擢侍御史抗論朝政歷指熙豐元祐間得失寧宗初改司農少卿進起居舍人朱文公領祠再疏爭之侂胄擅政禁僞學

武夷山志

卷之十六

主管

三十八

光祖撰涪州學記坐謫房州久之主管冲佑觀終顯謨閣直學士卒謚文節有後溪集十卷

魏了翁名華甫號鶴山浦江人登慶元己未進士開禧初以武學博士召試時侂胄謀開邊上言未可卒圖當急內修史彌遠承侂胄意劾其妄乃辭歸侂胄誅擢起居舍人復忤史彌遠出知常德府奸黨再劾之落職居靖州築鶴山書院士多從之遊旣六載知濮州以化善俗部使者忌之誣以細事奏罷主冲佑觀數月復原官紹定中又以修撰主冲佑觀彌遠死召爲禮部尙書尋遷樞密院事立朝僅六閱月凡二十餘疏皆當時急務諸

僉王巧爲排擠以資政殿學士知潭州卒謚文靖有五經要畧周易集義鶴山集諸書

趙善湘字清臣宋安懿王五世孫居明州初以恩補保義郎登慶元二年進士嘉定間知常州主冲佑觀後知湖州歷官兵部尙書進資政殿學士封公著有周易洪範春秋論說四書解及詩詞雜藁

張忠恕字行父綿竹人忠獻公浚之孫也父杓字定叟累官學士知建康府治績爲南渡京尹之最忠恕以祖任監樓店務嘉定間遷知寧國府以言去主管冲佑觀尋起知鄂州入爲戶部郎官請外補以直秘閣出知贛州

武夷山志

卷之十六

主管

三十九

紹定初復提舉冲佑觀致仕

黃文肅公幹主管冲佑觀者凡二一嘉定八年知漢陽軍歸一嘉定十一年知安慶府歸詳理學傳

武夷山志卷之十六終